



*Moÿse dresse un Tabernacle selon le commandement du Seigneur, & le Tabernacle est remply de la gloire de Dieu.*

**L**E Seigneur parla à Moÿse, disant: Au premier iour du premier mois tu dresseras le Tabernacle du témoignage, & poseras l'Arche en iceluy, & feras pendre du haut en bas le voile deuant elle; & ayant mis la table dedans, tu mettras sur icelle les choses qui sont legitimement ordonnées. Le Chandelier avec ses lampes, & l'Autel d'or auquel l'encens se brulle, sera posé deuant l'Arche. Tu poseras le voile à l'entrée du Tabernacle, & l'Autel de l'holocauste deuant luy & le cuueau entre l'Autel & le Tabernacle, lequel empliras d'eau, & entoureras le Paruis & son entrée de tentes; & prenant l'huile d'onction oindras le Tabernacle avec ses vaisseaux, & le cuueau avec son soubassement, afin qu'ils soient les saints des saints, & ameneras Aaron & ses fils à la porte du Tabernacle; & quand ils seront lauez d'eau, tu les vestiras des saints vestemens, afin qu'ils me seruent, & que leur onction profite à la Prestrie perpetuelle: Et Moÿse fit tout ce que le Seigneur luy auoit commandé. Or quand toutes ces choses furent parfaites, vne nuée couurit le Tabernacle du témoignage, & la gloire du Seigneur le remplit. Et quand la nuée déplaçoit de dessus le Tabernacle, les enfans d'Israël marchaient par leurs bandes & troupes, mais si elle s'arrestoit dessus, ils ne bougeoient du mesme lieu. Car la nuée du Seigneur se tenoit de iour sur le Tabernacle, & le feu de nuict, ce que voyoit tout le peuple d'Israël par toutes leurs demeures.

*Exode 40. 65. dernier Chap.*